

22/06/2002

Ketua keluarga mesti miliki ilmu kekeluargaan mencukupi

KETUA keluarga mesti melengkapkan diri dengan ilmu kekeluargaan supaya dapat membentuk keluarga bahagia sekali gus menangani gejala keruntuhan akhlak di kalangan anak Melayu.

Ahli Umno yang ditemui pada Perhimpunan Agung Umno 2002 di Pusat Dagangan Dunia Putra (PWTC) semalam, berpendapat kekhuatiran Presiden Umno, Datuk Seri Dr Mahathir Mohamad mengenai masalah keluarga tidak bahagia atau "broken family" perlu diberikan perhatian serius.

Ibu tujuh anak, Wahidah Salleh, 54, berkata kekurangan ilmu sering menyebabkan pasangan suami isteri gagal memainkan tugas untuk membentuk sebuah keluarga bahagia.

Beliau yang juga ahli Umno Jerantut, berkata seiring dengan tugasnya sebagai tenaga pengajar Kemas, beliau selalu menasihatkan ibu bapa di luar bandar supaya melengkapkan diri dengan ilmu pengetahuan.

"Tetapi saya sedih apabila kita buat kelas untuk meningkatkan ilmu dalam urusan kekeluargaan, hanya wanita yang hadir, lelaki tidak suka hadir.

"Jika kita ada ilmu tentunya kita mampu bertolak ansur dalam apa juga keadaan sekali gus mengelakkan pergaduhan dengan pasangan dan kehidupan akan menjadi lebih bermakna," katanya mengulas ucapan dasar Presiden.

Dr Mahathir berkata, jika ibu bapa tidak mempunyai nilai dan budaya hidup yang baik, sudah tentu anak tidak dapat dididik dengan baik.

Pengerusi Tetap Umno Bahagian Maran, Abdul Wahab Mat Aris, 70, ketika ditemui menganggap matlamat untuk mewujudkan negara aman dan sejahtera, bermula pada peringkat institusi keluarga.

"Apa yang disuarakan Presiden Umno adalah untuk kebaikan semua dan ia perlu diambil iktibar di kalangan ibu bapa supaya lebih mengutamakan hubungan sesama mereka," katanya.

Ahli Umno Jeli, Kelantan, Mohammad Noor Resat, 43, berkata ibu bapa perlu membentuk peribadi yang menjadi contoh atau idola di kalangan anak-anak.

"Pastikan ibu bapa tidak bertengkar di depan anak-anak, sebaliknya menunjukkan kasih sayang sesama mereka setiap masa," katanya.

(END)